

# Kommunimut pilersaarusiorneq aamma nunaminertat atorneqarnerat pillugit Namminersornerullutik Oqartussat nalunaarutaat

Pilersaarusiorneq aamma nunaminertat atorneqarnerat pillugit Inatsisartut peqqussutaanni nr. 11-imi, 5. december 2008-meersumi § 3 naapertorlugu aalajangersarneqarpoq:

## Kapitali 1

### *Siunertaq*

§ 1. Kommunalbestyrelsip nalunaarummi matumani maleruagassat malillugit pilersaarusiornermigut aqutsinermigullu, kommunip iluani nunaminertat inuiaqatigiit ataatsimut isigalugit nalilersuiffiusumik atorneqarnissaannik qulakkeerinissamut suleqataanissaa nalunaarummi siunertarineqarpoq.

## Kapitali 2

### *Kommunimut pilersaarutit*

§ 2. Kommunalbestyrelsip kommunimut pilersaarut makkuninnga imaqartoq suliarissavaa:

- 1) Kommunimut pilersaarummi kommunip ineriartortinneqarnerani siunertaasut anguniakkallu nassuiaasiorneqarnerinut immikkoortoq, tak. § 5.
- 2) Kommunip ataatsimut pingaarnertut ilusiligaaneranut immikkoortoq, tak. § 6, kiisalu kommuninimi illoqarfii, nunaqarfii aammalu nunaannarmi soqutiginaatillit ataasiakkaat pingaarnertut ilusiligaanerannut immikkoortoq, tak. § 7.
- 3) Aalajangersakkanut immikkoortoq, tassanilu aalajangersarneqassapput:
  - a) sumiiffiit ilaanni aalajangersimasuni ataasiakkaani nunaminertat atorneqarnerannut illoqarfeqarfimmullu aalajangersakkat pingaarnertut, tak. § 8, aamma
  - b) sumiiffiit ilaanni aalajangersimasuni ataasiakkaani nunaminertat atorneqarnerannut illoqarfeqarfimmullu aalajangersakkat sukumiisut, tak. § 9.
- 4) Kommunalbestyrelsip nunaminertanik atugassisarnernut aalajangersakkat, tak. § 10.

*Imm. 2.* Nunaannarmi pilersaarusiornermut nunaminertanullu oqartussaaffiup 1. januar 2011-imi kommuninut tunniunneqarnissaata tungaanut nunaannarmi nunaminertanik aqutsineq Naalakkersuisunit kapitali 4-imi aalajangersakkat naapertorlugit isumagineqassaaq.

### *Kommunimut pilersaarusiortarnermi periaasissat*

§ 3. Kommunalbestyrelsi kommunimi piffissap qinigaaffiusup affaa siulleg qaangiutsinnagu kommunimut pilersaarusiornermut periaasissanik saqqummiussissaaq. Aamma periaasissaq taamaattoq pisariaqartutut naapertuuttutulluunniit isumaqarfigineqarpat kommunalbestyrelsi taamaattumik

saqqummiussisinnaavoq. Tamatumunnga peqatigitillugu periaasissatut aalajangiunneqartoq tamanut ammasumik saqqummiunneqartoq Naalakkersuisunut oqartussaasunullu soqutigisaqarnikkut kalluarneqartunut nassiunneqassaaq.

*Imm. 2.* Kommunalbestyrelsimi ilaasortat arlaalluunniit, periaasissatut siunnersuummut imm. 1-imi taaneqartumut isummaminik allaasumik aalajangernissamut allattaavinnut ilanngussititsinissamik piomasaqarsimasoq, isummami allaasup tamanut ammasumik saqqummiunneqarnissaa piomasarisinnaavaa, tassungalu tunngavilersuut naatsoq, ilaasortamit oqaasertaliorneqartoq ilaatinneqassaaq.

*Imm. 3.* Periaasissatut siunnersuut, imm. 3 naapertorlugu ikinnerussuteqartut oqaaseqaatigisinnaasaannik ilaqartinneqartoq, sumiiffimmu innuttaasunit tikikkuminartumut, oqaaseqaateqarnissamut allannguutissanillu siunnersuuteqarnissamut sivikinnerpaamik sapaatit akunnerinut arfinilinnut piffissalerlugu tamanut saqqumtitassanngorlugu saqqummiunneqassaaq. Saqqummiussineq piffissaliussarlu pillugit tamanut nalunaaruteqarnermi, periaaseq kommunimi nalinginnaasumik atorineqartartoq atorineqassaaq.

*Imm. 4.* Imm. 3 naapertorlugu piffissaliussap naanerani kommunalbestyrelsip nutaamik suliarinninnermigut periaasissaq inaarutaasumik akuersissutigisinnaavaa. Tamatumunnga atatillugu kommunalbestyrelsip oqaaseqaatit tiguneqartut isummerfigissavai. Kommunalbestyrelsip tamatumunnga atatillugu tamanut ammasumik periaasissamut allannguutissat akuersissutigisinnaavai.

*Imm. 5.* Kommunalbestyrelsip periaasissaq tamanut ammasumik saqqummiutissavaa, aammalu nalunaarummik tamanut ammasumik saqqummiunneqartumik naqitamik ataatsimik oqartussaasunut, imm. 1-imi taaneqartunut nassiussissalluni.

**§ 4.** § 3, imm. 5 naapertorlugu tamanut ammasumik nalunaaruteqartoqareerpat, kommunalbestyrelsi periaasissami aalajangerneqartunik taamaattunik kommunimut pilersaarummut tassungaluunniit allannguutissanik siunnersuusiussaaq.

### **Kapitali 3**

#### *Kommunimut pilersaarutit imai*

##### *Kommunimut pilersaarutit nassuiaasiornermut immikkoortuat*

**§ 5.** Nassuiaammut immikkoortoq § 2, imm. 1-ip immikkoortuini siullermi taaneqartoq makkuninnga imaqaassaaq:

- 1) Suliassaqarfinnut agguataakkamik killiffinnut nassuiaat, ilanngullugit kommunimi najugaqariaatsimut, innuttaasut ineriartornerannut aammalu kommunimi inuussutissarsiutit ineriartornerinut kiisalu sanaartorfusimaneranut nassuiaat.
- 2) Immikkoortoq anguniakkanut tunngasoq, kommunalbestyrelsip kommuni ataatsimut isigalugu ineriartortitsinissamut nunaminertanillu atuinissamut anguniagaannik nassuiaateqarfusoq, ilanngullugit inissiat inuussutissarsiorfillu annertusarneqarnissaat, attaveqaatinut atortut aamma isumaginninnikkut, kulturikkut ilinniartitaanikkullu sullissivinnik pilersuineq, kiisalu sumiiffit sukisaarsaartarfii.
- 3) Pilersaarummut nassuiaat, kommunimut pilersaarummi pilersaarutit allat qanoq eqqarsaatigineqarsimanersut pillugu nassuiaaffusoq, ilanngullugit nuna tamakkerlugu pilersaarusiorneq, Naalakkersuisut kommunillu aningaasaqarnikkut pilersaarutaat kiisalu kommunip maannamut pilersaarutai.

*Kommunimut pilersaarutit pingaarnertut ilusiliinermut immikkoortuat*

**§ 6.** Kommuni ataatsimut isigalugu pingaarnertut ilusiliineq § 2, imm. 1-ip immikkoortuata aappaani taaneqartoq, kommunimi najugaqariaatsip nunaannarmilu nunaminertat ineriartornerannut pingaarnermut pilersaarutit naliliiffigineqarnerat tunngavigalugu aalajangersarneqassaaq.

*Imm. 2.* Tamatuma saniatigut kommuni ataatsimut isigalugu pingaarnertut ilusiliineq imm. 1-imi taaneqartoq, killiffinnut nassuiaammik, aammalu attaveqaatit naalagaaffimmit, Namminersornerullutik Oqartussanit kommuninillu pigineqartut ataatsimut atorneqarnerisa siunissami ineriartornissamut periarfissaannik naliliissummik imaqsarinnaavoq.

**§ 7.** Kommunini illoqarfinni, nunaqarfinni nunaannarmilu soqutiginaatilinni ataasiakkaani ilusissat pingaarnerit § 2, imm. 1, nr. 2-mi taaneqartut, nassuiaasiornermut immikkoortup suliassaqaarfinnut pilersaarutitaannik eqikkaalluni naliliinikkut aalajangersarneqassapput kiisalu nunami sumiiffinnut aggornilersuineq killeqarfilersuinerlu aalajangersarneqassalluni.

*Imm. 2.* Imm. 1 naapertorlugu kommunimut pilersaarutip ilusissaani pingaarnermi kommunimi sumiiffiit ilaasa inissiffissaat killissaallu makku eqqarsaatigalugit aalajangersarneqassapput:

- 1) inissiat,
- 2) sumiiffiit inuussutissarsiutinik ingerlataqarfusut umiarsualiviillu, ilanngullugit nunaminertat suliffeqaarfinnut avatangiisinut mingutsitsisunut atorneqartut, kiisalu nunaminertat mingutsitsiviusut mingutsitsiviusinnaasutullu ilimanaateqartut,
- 3) qitusoqarfiit, ilanngullugit sumiiffiit ataatsimoortumik atorneqartussatut siunertaqarfusut kiisalu pisortat sullissiviinut atorneqartut il.il.,
- 4) sumiiffiit sanaartorfigeqqusaanngitsut aamma sumiiffiit sukisaarsaarnermik siunertaqarfusut, ilanngullugit sunngiffimmi atortut anginerit il.il.,
- 5) pilersuinermit teknikkimut atortoqarfiit atortullu attaveqarnermut tunngasut allat, ilanngullugit angallannermit atugassatut sanaartukkat,
- 6) illuaqqat, nunaleriffiit, orpinnik naatiteriffiit, qimmeqarfiit, kuuit, tatsit, sinerissami nunaminertanik atuineq, imaanik atuineq, sumiiffiit pinngortitap kulturilluunniit oqaluttuarisaaneramik immikkut soqutiginaatillit, sumiiffiit sukisaarsaarnermut immikkut atorneqartut il.il.

*Imm. 3.* Kommunimut pilersaarutip immikkoortuinik imm. 2 naapertorlugu aalajangersaarnermut atatillugu makku aalajangersarneqassapput:

- 1) sanaartukkanut, isumannaallisaaneq imaluunniit sanaartugartarpiaasa (killeqarfiit immikkut akuerisaasut) isumannaarneqarnissaat eqqarsaatigalugu, kiisalu nunaminertanut imermik milluaaffiusunut il.il. illersuinissamut killeqarfiit,
- 2) eqqissisimatitanik eriagisassanillu isumaginninneq, ilanngullugit illut illoqarfiullu ilai eqqissisimatitat eriagisassallu, kiisalu pinngortitami pingaartitat sumiiffilluunniit immikkut eriagisassat.
- 3) sumiiffiit ilaasa atorneqalernissaannut allilernerneqarnissaannullu tulleriiaarineq.

*Imm. 4.* Aamma imm. 1 naapertorlugu pingaarnertut ilusiliinermi pissutsit allat, nunaminertamik atuinermut sanaartukkanullu annertuumik pingaarutillit aalajangersarneqarsinnaapput.

*Kommunimut pilersaarutit aalajangersakkanut immikkoortui, aalajangersakkat pingaarnerit*

**§ 8.** Nunaminertat atorneqarnerannut sanaartukkanullu aalajangersakkat pingaarnerit § 2, imm. 1, nr. 3 a)-mi taaneqartut, sumiiffiit ilaannut aalajangersimasunut ataasiakkaanut makku eqqarsaatigalugit

aalajangersarneqassapput:

- 1) nunaminertat illoqarfeqarfillu atorneqarnerat, ilanngullugit sullissiviit pisortalluunniit kiffartuussiviisa allat inissisimaffii,
- 2) illoqarfeqarfiup suussusaa, inissisimanera annertussusaalu, ilanngullugit ilaatigut illut eqimassusissaasa, portussusissaasa, imminnut ungasissusissaasa ilusissaasalu malittarisassiornerat,
- 3) sumiiffiup ilaani aalajangersimasumi inissiat inuussutissarsiutilluunniit eqqarsaatigalugit sanaartorfiunngitsunit sinneruttut,
- 4) pigisat eqqissisimatitat eriagisassallu, ilanngullugit illut, sanaartukkat sumiiffilluunniit eqqissisimatitat eriagisassalluunniit, pinngortitami pingaartitat eriagisassat kiisalu sumiiffiit kulturip oqaluttuarisaaneranut iluatinnaatillit,
- 5) qaartartuusivinnut, tankeqarfinnut, mittarfinnut, imermut pissamaateqarfittut immikkoortitanut, nalunaarasuartaaserisoqarfinnut ikuallattoqarnissaanullu upalungaarsimaffinnut isumannaallisaanermut killeqarfiit,
- 6) sumiiffiup ilaani aalajangersimasumi angallaffiit aamma pilersuinermit atortut inissisimaffii, ilanngullugit aqqusernit ledningeqarfillu,
- 7) sumiiffiup ilaani aalajangersimasumi illoqarfiup nutarterneqarnera isaterinerlu,
- 8) sumiiffiup ilaani aalajangersimasumi tullerriaartumik annertusaaneq,
- 9) sumiiffiup ilaani aalajangersimasumi, nuna tamakkerlugu pilersarusiornermut soqutiginaatillit isumannaarneqarnissaat siunertaralugu Naalakkersuisunit aalajangiunneqarsimasumi, immikkut aalajangersakkat.

*Imm. 2.* Imm. 1 naapertorlugu aalajangersakkani pingaarnerni kommunimut pilersaarutip naammassineqarnissaanut kommunalbestyrelsen akuersinerata saniatigut oqartussaasunit allanit akuersissutinik pissarsinissaq pisariaqartinneqarnerneq allanneqassaaq.

*Kommunimut pilersaarutit aalajangersakkanut immikkoortui, aalajangersakkat sukumiisut*

**§ 9.** § 2, imm. 1, nr. 3 b) naapertorlugu aalajangersakkani sukumiisuni sumiiffiup ilaata aalajangersimasup atornerneqarneranut siunertaasoq allanneqassaaq.

*Imm. 2.* § 2, imm. 1, nr. 3 b) naapertorlugu sumiiffiit ilaannut aalajangersimasunut ataasiakkaanut aalajangersakkat sukumiisut pissutsit makku pillugit aalajangersarneqarsinnaapput:

- 1) illoqarfeqarfiup inissiffissaa, ilanngullugit sanaartorfissanik aalajangersaaneq,
- 2) illut silataasa isikkussaat, ilanngullugit ilaatigut ilusilersorneqarnissaannut, qaliaasa ilusissaannut, toqqaviisa portussusissaannut, atortunut qalipaasersorneqarnissaannullu aalajangersakkat,
- 3) aqqusernit pisinnaallu aqqutaat, aammalu pissutsit allat angallannermit pingaaruteqartut, ilanngullugit angallaffiusunut aqqutissat aamma angallattut assigiinngitsut avissaartisimaneqarnissaannut tunngasut,
- 4) sumiiffiup ilaani aalajangersimasumi nunaminertanik atorneranngitsunik sunngiffimmiluunniit atortoqarfiusinnaasunik peqarnissaa,
- 5) ledningeqarfiit inissisimaffii, ilanngullugit innaallagissamik imermillu pilersuineq,
- 6) nunaminertat sanaartorfiunngitsut ilusaat, atornerneqarnerat allanngutsaalineqarnerallu, ilanngullugit nunaminertat atorneranngitsut, nunamik manissaanerit, ungalulersuineq, naasunik allanngutsaaliuineq kiisalu aqqusinerit angallaffiusunillu allanik qaammaqqusersuinerit,
- 7) illunik pioreersunik taakkulu avatangiisaannik qaninnermik allanngutsaaliuineq, taamaalilluni illut

aatsaat kommunalbestyrelsip akuersissuteqarneratigut isaterneqarsinnaallutik,  
allanngortiterneqarsinnaallutik allatulluunniit allannguiffigineqarsinnaallutik,  
8) pinngortitamik illersuinissamik soqutigisanik isumaginninneq kiisalu nunaminertanik ilutsimikkut  
nalilinnik allanngutsaaliuineq,  
9) nunalerinermi soqutigisanik isumaginninneq, ilanngullugit nunaleriffiit immikkut naleqartut  
qulakkerneqarnissaat,  
10) atortunut ataatsimoorussanut, angallaffinnut teknikkikkulluunniit pilersuinermit atortunut  
atugassiineq attaviliinerluunniit, imaluunniit sanaartukkat nutaat atorneqalissappata sumiiffiit  
pilersaarutip avataaniittut atuilernissaannik piumasaqaateqarneq,  
11) atortunik ataatsimoorussanik pilersitsinermut atatillugu aningaasaqarnermut tunngasunik  
maleruagassiorneq, ilanngullugit atuisinnaatitaanermik pigisaqartunut peqatigiiffimmik pilersitsineq,  
tassunga ilaasortaanissamut pisussaaffeqarneq aamma peqatigiiffiup nunaminertanik ataatsimoorussanik  
atortunillu ataatsimoorussanik pilersitsinissamut, ingerlatsinissamut aserfallatsaaliuinissamullu  
pisinnaatitaaffeqarnerat pisussaaffeqarnerallu, aamma  
12) nipimik, pujoralammik, tipimik allanillu avatangiisinut ajoqutaasinnaasunik killilersuineq, ilanngullugit  
nunaminertat illullu saniliusut eqqarsaatigalugit atorneqarnissaannut killilersuutaasinnaasut.  
*Imm. 3. § 2, imm. 1 nr. 3 b) naapertorlugu sumiiffiup ilaanut aalajangersimasumut imm. 2-mi taaneqartut  
saniatigut pissutsinut allanut aalajangersaasoqarsinnaasoq Naalakkersuisut aalajangiisnaapput.*

*Kommunalbestyrelsip nunaminertanik atugassanngortitsisarneranut aalajangersakkat*  
**§ 10.** Nunaminertanik atugassanngortitsisarnermut aalajangersakkat § 2, imm. 1, nr. 4-mi taaneqartut  
kommunimut tamarmiusumut atuuttussanngorlugit aalajangersarneqassapput. Aalajangersakkat  
nunaannarmi nunaminertanut, illoqarfimmi nunaqarfinniluunniit ataasiakkaanut imaluunniit sumiiffiit  
ilaannut aalajangersimasunut immikkut aalajangersakkanik ilassuserneqarsinnaapput.  
*Imm. 2.* Aalajangersakkat makku eqqarsaatigalugit aalajangersarneqassapput:  
1) nunaminertamik atugassinneqarnissamik qinnuteqaatit assigiimmik suliarineqartarnissaasa  
qulakkeerneqarnissaa,  
2) kommunimut pilersaarusiornermut anguniakkanik naammassinninnissaq, aamma  
3) sanaartorfissagissaanermut aningaasartuutaasinnaasunik kiisalu aningaasanik illoqarfiup  
ineriartorneranut pingaarteqartunik agguasseriaatsit.

## **Kapitali 4**

### *Nunaminertanik atugassiisarneq*

#### *Nunaminertamik atuisinnaatitaanissamik qinnuteqaateqartarneq*

**§ 11.** Nunaminertamik atuisinnaatitaanissamik qinnuteqaat kommunimi pineqartumi  
kommunalbestyrelsimut nassiunneqassaaq.

#### *Nunaminertanut qinnuteqaatit tamanut ammasumik saqqummiunneqartarnerat*

**§ 12.** Kommunalbestyrelsi pisussaavoq, illoqarfinni nunaqarfinnilu nunaminertamut atuisinnaatitaanissap  
inaarutaasumik aalajangiiffigineqannginnerani, qinnuteqaat tamanut ammasumik  
ilisimatitsissutigissallugu.

*Imm. 2.* Qinnuteqaatigineqartumi sumiiffiup ilaanut aalajangersimasumut aalajangersakkat atuuttut malinneqarpata, imm. 1-imi ilisimatitsisussaataaneq saneqqunneqarsinnaavoq.

*Imm. 3.* Nunaminertat, illut, sanaartukkat nunaminertanilluunniit atuinerit allat minnerusut imaluunniit pingaaruteqannginnerusut pineqartillugit, ilanngullugit nunaminertamik atuinernik allannguinerit imaluunniit illuutininik tunisinnermut atatillugu atuisinnaatitaanermik tunniussinerit il.il., imm. 1-imi ilisimatitsisussaataaneq saneqqunneqarsinnaavoq.

**§ 13.** Qinnuteqaammik paasisutissiinnermut atatillugu, qinnuteqaammut akerliliissuteqarnissamut ullunit 14-init sivikinnerunngitsumik piffissaliisoqassaaq.

*Imm. 2.* Qinnuteqaammut akerliliisoqarsimappat, kommunalbestyrelsip qinnuteqaammik suliaqarnerminut atatillugu akerliliissutaasoq ilanngullugu suliarissavaa.

**§ 14.** Kommunalbestyrelsi pisussaavoq, nunaannarmi nunaminertamik tunniussinissap nalunaarutigineqarnissaa sioqqullugu tamanna pillugu qinnuteqaat suleqatinut attuumassutilinnut tusarniaassutigissallugu.

*Imm. 2.* Imm. 1 naapertorlugu tusarniaanermut atatillugu qinnuteqaat attuumassutilinnut nassiunneqassaaq. Tamatuma kingorna tusarniaaffigineqartut kommunalbestyrelsip piffissaliussaata iluani tusarniaanermi akissuteqassapput. Tusarniaanermut akissuteqarnissamut piffissarititaasoq, tusarniaaffigineqartup qinnuteqaammik tigusaqarneraniit sivikinnerpaamik ullunik 14-inik sivilissusilerneqassaaq.

**§ 15.** Kommunalbestyrelsi pisussaavoq, kommunip illoqarfini nunaqarfinilu nunaminertat suut kommunip pilersaarutai sanaartorfissagissaanissamullu pilersaarutai malillugit tunniunneqartussatut naatsorsuutigineqarnersut ingerlaavartumik tamanut saqqummiuttassallugit.

#### *Nunaminertanik atugassiisarneq*

**§ 16.** Kommunalbestyrelsi pisussaavoq, nunaminertamik atugassiinerup nuna tamakkerlugu pilersaarusiornermi soqutiginaatilinnut akerliunnginnissaa nakkutigissallugu.

*Imm. 2.* Aamma nunaminertamik atugassiineq kommunimut pilersaarummut naapertuutissaaq, ilanngullugit sumiiffiup ilaanut aalajangersimasumut pineqartumut aalajangersakkat, kommunimut pilersaarummi aalajangersarneqarsimasut, tak. §§ 8 aamma 9.

*Imm. 3.* Pilersaarusiorneq aamma nunaminertat atorineqartarnerat pillugit Inatsisartut peqqussutaanni nr. 11-imi, 5. december 2008-meersumi § 24 naapertorlugu inerteqquteqarnissaaq aalajangiunneqarsimanngippat, aammalu tamatuma kingorna sumiiffiup ilaani pineqartumi atuinissamik qinnuteqaateqarnissamut akornusiisumik aalajangersaasoqarsimanngippat, qinnuteqaateqarnissamut piumasaqaatit imm. 1-imi aamma 2-mi naammassineqarsimappata kommunalbestyrelsi nunaminertamik atugassiisusaavoq.

#### *Nunaminertanik atugassiinernut atatillugu atugassarititaasut*

**§ 17.** Kommunalbestyrelsi nunaminertanik tunniussinerminut atatillugu pissutsit makku pillugit piumasaqaateqassaaq:

- 1) nunaminertamik atuneq,
- 2) akuersissutip atornissaanut sivilisnerpaamik ukiunut marlunnut piffissaliineq,
- 3) sanaartorfissagissaanissamut aningaasartuutininik akiliinissaaq,
- 4) pisariaqarpat sanaartukkanut ataatsimoorussanut attaviliinissamut pisussaaffiliineq,

- 5) atuisinnaatitaanerup atorunnaarsinnaanera,  
6) nunaminertamik atuinerup naaneranut atatillugu salinissamut pissusitoqaanullu utertitsinissamut  
pissusaaffiliineq, aamma  
7) oqartussaasunit akuersissutit pisariaqartinneqartut allat, nunaminertamik atuilinnginnermi  
qinnuteqaatigineqartussat.  
*Imm. 2.* Pissutsit sumiiffiup ilaanut aalajangersimasumut aalajangersakkanut atuuttunut  
naammaginnartumik suliarineqarsimanngippata, aamma kommunalbestyrelsi pissutsit makku pillugit  
ilassutaasunik piumasaqaateqarsinnaavoq:  
1) angallannermut isersinnaanermullu tunngasut,  
2) ruujoreqarfiit ledningeqarfillu inissisimaffii, aamma  
3) pissutsit allat, kommunimut pilersaarutip piviusunngortinnissaanut pingaaruteqartut.

#### *Nalunaarsuineq*

**§ 18.** Kommunalbestyrelsi pissusaavoq kommunip iluani nunaminertat tunniunneqartut nutaat  
nalunaarsussallugit.

*Imm. 2.* Kommunalbestyrelsi pissusaavoq pisinnaatitaaffiit pioreersut misissussallugit iluarsaatissallugillu,  
taamaalillunilu kommunimi atuisinnaatitaaffiusut atuuttut ataatsimut takussutissiornissaat  
isumagissallugu.

**§ 19.** Nunaminertanik atugassiissuteqarnerit tamanut ammasuussapput, ilanngullugit nunaminertamik  
atugassiinermut atatillugu atugassarititaasut, tak. § 18.

*Imm. 2.* Paasisutissat mianerisariallit inunnut ataasiakkaanut tunngasut, nunaminertamik atugassiinermi  
allassimasut imm. 1-imut ilaatinneqanngillat.

#### **Kapitali 5**

##### *Atuutsitsilernissamut aalajangersakkat*

**§ 20.** Nalunaarut 1. marts 2009-mi atuutilerpoq.

*Namminersornerullutik Oqartussat, ulloq 26. februar 2009.*

Kim Kielsen

/

Steffen Ulrich-Lynge

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut